

Introdukshon di Bukinan Profétiko

Tèstamènt Bieu ta konsistí di sinku buki di Pentatuk, 12 buki históriko, sinku buki poétiko i 17 buki profétiko. E 17 buki profétiko ta e bukinan nos dilanti.

Maske e bukinan profétiko ta sigui e bukinan poétiko, nan tin un otro tono for di esnan poétiko. Entre otro, en general e bukinan poétiko a wòrdu skirbí den e era di *prosperidat* di pueblo di Dios. En kontraste, e bukinan profétiko a wòrdu skirbí den e era di *skuridat* di pueblo di Dios.

No ta konosí pakiko e bukinan profétiko ta lokalísá na fin di Tèstamènt Bieu. George Adam Smith a bisa ku kisas e motibu ta pasobra “profesia ta okupá e último frontera entre Tèstamènt Bieu i esun Nobo”.

Ta visto ku e bukinan profétiko di Beibel ta hopi importante. Tur huntu nan ta forma kasi 1/3 di henter Beibel. E palabranan “profeta”, “profesia”, èts. ta aparesé 660X den Beibel—2/3 di nan den Tèstamènt Bieu. Beibel ta mustra ku reinan, saserdotenan i huesnan tabata importante den bida di hudiunan den era di Tèstamènt Bieu. Ma e ministerio di profeta tambe a bira importante.

En general, e reinan a bandoná Dios. E no por a papia dor di nan. Por bisa ku e profetanan a bira e voseronan di Dios—boka di Dios—den e era ei, proklamando loke Dios tabata ke pa nan bisa. Nan tabata hòmbènan ku Dios a yama pa komuniká Su mensahe den un tempu ku Su pueblo tabata den un kondishon di dekadensia spiritual.

Ora Israel a wòrdu konkistá i su habitantenan deportá, Dios ta splika Su pueblo pakiko esei a sosodé. Palabra di Dios ta bisa den 2 Reinan 17:7-14: “Awor esaki a sosodé, pasobra e yunan di Israel a peka kontra SEÑOR nan Dios, Kende a saka nan for di tera di Egipto, for di man di Faraó, rei di Egipto; i nan a teme otro diosnan i a kana segun e kustumbernan di e nashonnan ku SEÑOR a kore ku nan for di dilanti di e yunan di Israel, i segun e kustumbernan ku e reinan di Israel a introdusí. I na sekreto e yunan di Israel a hasi kosnan ku no tabata korekto kontra SEÑOR nan Dios. Ademas, nan a traha lugánan haltu pa nan mes den tur nan statnan, for di e toren di vigilansia te na e stat fortifiká. I nan a lanta pa nan mes pilarnan sagrado i imagennan di Asera riba tur seru haltu i bou di tur palu bèrdè, i aya nan a kima sensia riba tur e lugánan haltu, manera e nashonnan ku SEÑOR a hiba den eksilio nan dilanti tabata hasi; i nan a hasi kosnan malu, probokando SEÑOR. I nan a sirbi ídolonan, di kualnan SEÑOR a bisa nan: “No hasi e kos aki.” *Tòg SEÑOR a spièrta Israel i Juda pa medio di tur Su profetanan i tur miradó, bisando: “Bira for di boso mal kamindanan i warda Mi mandamentunan, Mi statutonnan, konforme henter e lei ku Mi a ordená boso tatanan, i ku Mi a manda pa boso pa medio di Mi sirbidónan, e profetanan.” Sinembargo, nan no a skucha, ma a hasi nan nèk steif manera nan tatanan, kendenan no tabata kere den SEÑOR nan Dios.”* Desobedensia pa ku Palabra di Dios proklamá dor di (entre otro) profetanan a resultá den kastigu di Dios.

I. MINISTERIO DI E PROFETANAN

Profetanan tabata yamá pa diferente nòmber òf título den Tèstamènt Bieu. Naturalmente nan tabata yamá “profeta”. Un otro palabra, ménos usá tabata “miradó” (1 Samuel 9:9,11,18,19).

“Hòmber di Dios” ta un otro título (1 Samuel 9:6-8,10; 1 Reinan 13; 2 Reinan 1:9-13). Tambe ta notabel ku den sierto teksto Dios ta referí na profetanan komo “Mi sirbidó” (2 Reinan 9:7; 17:13; Ezekiel 38:17; Daniel 9:6).

Ora ta papia tokante “profesia”, “profeta”, “profétiko”, èts., mes ora nos tin tendensia di pensa tokante pronostikashon di eventonan futuro. Ma nos tin ku komprendé ku pronostikashon no ta e úniko konsepto di profesia usá den Beibel. E profetanan tabatin dos tarea:

A. PRONOSTIKASHON

Ora nos ta pensa di e palabranan “profesia” òf “profeta”, mes ora nos ta pensa di pronostikashon di eventonan den futuro òf un hende ku ta bisa loke ta bai sosodé den futuro.

Ta un echu ku den e bukinan profétiko, nos ta enkontrá pronostikashonnan inkreíbel. Algun ya kaba a keda kumplí mientras te ainda nos ta warda pa kumplimento di otronan, maske e profesianan a wòrdu duná 2500 di aña pasá!

E bukinan profétiko ta duna un di e evidensianan mas konkretu ku Beibel ta Palabra di Dios. E bukinan profétiko ta kontené shenes di profesia ku ya kaba ku a wòrdu kumplí. Ma igualmente tantu kumplimentu di profesianan no ta sosodé pa kasualidat.

Nota un ehèmpel pa nos por komprendé kon profesia ta proba ku Beibel ta Palabra di Dios. Maske metrelogische dienst por ta basta sigur di nan pronostikashonnan, tòg nan no por pronostiká wer ku eksaktitut. Hopi biaha nan ta kiboká. Ta hopi difísil pa pronostiká wer 24 ora adelantá. Ta muchu mas difísil pa pronostik’é mas ku tres dia adelantá. E probabilidadat ku e pronostiko lo no sosodé ta bira mas chikitu kada biaha ta agregá mas tempu òf mas ingrediente. Si bo ta pronostiká: Mañan mainta solo lo bria skèrpi—bo tin 1 chèns den 2 di ta korekto. Si bo ta pronostiká: Mañan mainta solo lo bria skèrpi i mañan atardi awa lo yobe—bo tin 1 chèns den 4 di ta korekto. Si bo pronostiká: Mañan mainta solo lo bria skèrpi, mañan atardi awa lo yobe i manna anochi shelunan lo no ta nubia—bo tin 1 chèns den 8 di ta korekto. Mas pronóstiko, mas chèns di kiboká.

Beibel ta kontené shenes di profesia. Maske tin profesia ku ta regardá futuro ainda i pues no a wòrdu kumplí ainda, tin shenes di profesia ku a wòrdu kumplí palabra pa palabra...demonstrando ku Beibel ta Palabra di Dios!

E profeta mes tabata sa kon su profesia lo keda kumplí? Probabelmente nò. Maske e profeta a komprendé e mensahe ku el a komuniká, tòg e no nesesariamente tabata sa kon su profesia lo wòrdu kumplí ni den kua era.

Ku frekuensia un òf otro profeta a haña un vishon, soño, èts. Motibu pa e vishon ta pa komuniká un mensahe for di Dios. Hopi studiante di Beibel ta trata e vishon mas importante ku e mensahe mes. Esaki ta un kibokashon grandi. E vishon ta komuniká un mensahe. Ma e vishon *no* ta e mensahe. E ta solamente e medio pa komuniká e mensahe—e ènvelop ku ta kontené e karta.

Pasobra hopi studiante di Beibel ta kiboká riba e punto aki, nan ta purba splika tur e detayenan simbóliko di e vishon—nifikashon di koló di e kabai, nifikashon di e metal for di kua e imagen ta trahá, nifikashon di kada wil, èts. Nan ta konfia nan abilidat pa splika nifikashon di e símbolonan i ta hasi hopi esfuerso pa defendé nan interpretashonnan. Ma hasiendo esaki, nan ta pèrdè e mensahe ku e vishon ta komuniká. No ta nesesario pa komprendé kada delaster detaye di e vishon pa komprendé e mensahe. (I kòrda tambe ku tin bes Dios a usa símbolonan pa skonde na lugá di revelá.)

Ta sumamente importante pa e studiante di profesia kòrda ku e ta un alumno, no un profeta. Semper mantené aktitut di un alumno!

Si bo a biba den e era ei, kon lo bo por sa ku siertu hende ta un profeta di Dios? Kon pueblo di Dios den e era ei por tabata sa ken ta un profeta di Dios? Dos teksto den Deuteronomio ta duna e kontesta. “Si un profeta òf un soñadó di soño lanta meimei di boso i dunabo un señal òf un milager, i e señal òf milager ku el a papia ku bo di djé sosodé, i e bisabo: 'Laga nos sigui otro diosnan (ku bo no a konosé) i laga nos sirbi nan,' bo no mester skucha e palabranan di e profeta ei ni di e soñadó di soño ei; pasobra ta SEÑOR boso Dios ta pone boso

na prueba, pa haña sa si boso ta stima SEÑOR boso Dios ku henter boso kurason i ku henter boso alma.” (13:1-3). Pues, pueblo di Dios no mester konkluí outomatikamente ku un persona ta di Dios si e ta pronostiká algu i su profesia ta keda kumplí. Ta sumamente importante pa averiguá bon si su doktrina ta harmonisá ku Skritura. Si esei no ta e kaso, *e no ta di Dios maske kon milagroso kumplimentu di su profesianan ta.*

E di dos teksto ta determiná si un profeta ta di Dios ta hañá den Deuteronomio 18:21-22. “I si bo bisa den bo kurason: ‘Kon nos lo konosé e palabra ku SEÑOR no a papia?’ si un profeta papia den nòmber di SEÑOR i e kos no sosodé ni bira realidat, esei ta loke SEÑOR no a papia. E profeta a papia esaki ku tribilidat; no tene miedu di djé.” E di dos manera ku pueblo di Dios por tabata sa ken ta un profeta di Dios tabata kumplimento di e profeta su profesianan den nan totalidat. Kumplimentu di profesianan di korto plaso den nan totalidat a indiká ku e profesianan di largu plaso lo wòrdu kumpli.

Ta bon pa mensioná tambe (no bruha riba e punto aki) ku den un otro sintido ningun mensahe di e profetanan tabata pronostikashon. Por ehèmpel, si mi bisa, “Mañan koriente lo kai afó den tres barrio di isla”, esei por ta pronostikashon. Sinembargu si mi ta traha na kompania di elektrisidat i intenshonalmente mi ta kita koriente for di tres barrio, no ta korekto pa yama esei kumplimentu válido di un pronóstiko. Motibu ku esei no ta un kumplimentu válido ta pasobra mi tin e abilidad òf outoridat pa sòru ku mi pronóstiko lo wòrdu kumpli.

Den kaso di e pronóstikashonnan di e profetanan, nan simpelmente tabata komuniká e mensahe ku Dios a duna nan. E profetanan tabata simpelmente e “partidó di karta” di Dios. Pues, loke nan a pronostiká tabata *Dios* Su mensahe. Debí ku Dios tin e abilidad i outoridat pa sòru ku e profesia lo wòrdu kumplí, no por bisa ku Dios a pronostiká (maske e profetanan no tabatin e abilidad òf outoridat ei). P’esei—den e sintido ei—por bisa ku ningun mensahe di e profetanan tabata pronostikashon. Un di e motibunan prinsipal pa profesianan den Beibel ta pa hende realisá bon kla ku *Dios* ta Esun ku a kousa e eventonan, ku *Dios* ta esun ku a hasi e eventonan ei sosodé.

Maske e profetanan di Tèstament Bieu pronostiká siertu evento, di bèrdat esei *no* tabata nan tarea prinsipal. Kiko tabata e parti prinsipal di nan ministerio?

B. PROKLAMASHON

E profetanan tabata e predikadornan di nan era! Nan a prediká...proklamá Palabra di Dios na e puebel di Dios. E bukinan profétiko no solamente ta pone hopi énfasis riba e parti spiritual di e puebel di Dios ma e tambe ta enfatisá bondat i moralidat sosial.

E profetanan tabata hende masha patriótiko. Sinembargu nan a pone Dios promé den nan bida. Nan no a sera wowo pa ku piká den nan komunidat i nashon. Nan a proklamá e mensahe di Dios pa e hendenan di nan era. Nan mensahe a demandá konvikshon i kurashi di nan parti!

E predikashi di profetanan a inkluí diferente komponente. 1) Reprendementu. Nan a deskribí e ofensanan di Israel òf Juda kontra Dios. Nan a sklama kontra e maldat di e era den kua nan a biba. Nan a reprendé piká di tantu mandatarionan komo di suidananonan. 2) Proklamashon ku huisio ta na kaminda pa motibu di piká. 3) Roga pa e hendenan umiyá nan mes, repintí, i bolbe serka Señor. 4) Instrukshon kon pueblo di Dios mester biba. Ademas nan a prediká un mensahe di 5) konsuelo i speransa. Mayoria bes e konsuelo a bin despues di kastigu pa piká.

E mensahenan di e profetanan no tabata semper revelashonnan nobo for di Dios. Di bèrdat, nan a hasi meskos ku predikadornan awendia...studia Palabra di Dios i proklamá loke Skritura ta bisa. Pues, e mensahe no a originá ku nan. Nan a proklamá e mensahe di Dios.

Proklamashon—no pronostikashon—tabata e tarea prinsipal di profetanan. Di bèrdar, proklamnan ta forma e gran mayoria parti di e kontenido di e bukinan profétiko...no pronostikashon!

II. HISTORIA I E PROFETANAN

Ma ta bon pa para ketu i pensa un ratu tokante tur e profetanan en general. No tur profeta ku a biba den e era ei a skirbi nan mensahenan. Tur profeta a komuniká na un forma verbal ku hende di nan era. Ma den kaso di bastante profeta, nan mensahe no a wòrdu skirbí.

Tur profeta no tabata profeta den e ménos den un òrdu kronológiko: Abraham (Génesis 20:7), Moises (Deuteronomio 34:10), Miriam (Eksodo 15:20), Débora (Huesnan 4:4), profeta onónimo (Huesnan 6:8), Samuel (1 Samuel 3:20), Gad (1 Samuel 22:5), Natan (2 Samuel 7:2), Zadok (2 Samuel 15:27), Heman (1 Krónikanan 25:5), Ahias (1 Reinan 11:29), “hòmber di Dios onónimo (1 Reinan 13), profeta bieu onónimo di Bèt-èl (1 Reinan 13), Ido (2 Krónikanan 9:29), Semaias (2 Krónikanan 12:5), Azarias (2 Krónikanan 15:8), Hanani (2 Krónikanan 16:7), Jehú (1 Reinan 16:7), Jahaziel (2 Krónikanan 20:14), Eliezer (2 Krónikanan 20:37), Elias (1 Reinan 18:36), profeta onónimo (1 Reinan 20:13), profeta onónimo (1 Reinan 20:38), Mikaias (1 Reinan 22:7-8), Zakarias (2 Krónikanan 24:19-20), profeta onónimo (2 Krónikanan 25:7), Eliseo (2 Reinan 3:11), Hulda (2 Krónikanan 34:22).

Ora Dios tabata ke preservá un mensahe pa e siguiente generashonnan, El a laga profetanan *skirbi* Su mensahe. E profetanan ku a skirbi un buki di Beibel (i no ta inkluí den e lista) ta esnan ku nos ta bai studia. Era di e profetanan ei a dura mas òf menos 400 aña—for di mas òf ménos aña 840 B.C. (Abdias) te aña 420 B.C. (Malakias).

Mas na komienso di historia di Israel, e profetanan tabata lídernan den nan komunidad tambe. Moises, vários hues i Samuel ta bon ehèmpel di esaki. Ma una bes Samuel a ungi Saul komo rei di Israel, e profeta a bira un konsehero pa ku e rei (maske tin bes esaki no tabata un puesto ofisial).

Despues ku Saul a wòrdu koroná, talbes Samuel tabata e promé ku tabatin e *puesto* di profeta (mas òf ménos aña 1050 B.C.). Ma no tabata te era di e reino dividí (ora Israel a separá for di Juda pa forma dos nashon durante reino di Roboam) ku mas tantu profeta a aparesé.

Pusíbelmente Samuel a funda skolnan pa profetanan hóben. Un Samuel 19:20 ta papia di un “*grupo di profeta ta profetisá, ku Samuel pará na kabes*”. Segun Fred E. Young, “E origen i historia di e skolnan aki ta desconosí. Segun [1 Sam] 3:1, promé ku yamada di Samuel komo profeta, e palabra profétiko tabata skars na Israel, i profesia tabata limitá. Tin poko duda ku e unionnan di profetanan aki a originá na tempu di Samuel, i a wòrdu inisiá dor di dje...E unionnan aki kisas a krese te tempu di Elias i Eliseo. Nan a aparesé solamente na Israel, no na Juda.”

Despues di aña 420 B.C. tabatin un silencio di mas òf ménos 400 aña. No tabatin asta un profeta pa 400 aña...te ora Juan Boutista a aparesé.

Ta hopi importante tambe pa komprendé ku e bukinan profétiko no ta poné den nos Beibel den un òrdu kronológiko. Pues, Isaias no tabata e promé profeta, sigui pa Jeremias, Ezekiel, èts. Ta un yudansa grandi pa sa e fecha i era den kua e profetanan a profetisá. Un i 2 Reinan, 1 & 2 Kronikanan, Esdras i Nehemias ta relatá e historia di e lidernan polítiko di Israel i Juda.

Ora nos ta studia kada buki, nos lo purba determiná e fecha i era di e profeta konserní. Ma aki nos lo duna un idea general. Profetanan promé ku eksilio di Israel òf Juda: Abdias, Joel, Jonas, Amos, Oseas, Isaias, Mikeas, Nahum, Habakuk, Sofonias, Jeremias. Profetanan durante eksilio di Juda na Babilonia: Ezekiel i Daniel. (Jeremias su ministerio a ekstendé te e tempu aki tambe.) Profetanan despues di eksilio: Hageo, Zakarias, Malakias

III. KONGREGASHON DI E PROFETANAN

Semper e profeta tabata un desendiente di Abraham. Ma nan palabranan no tabata dirigí solamente pa ku desendentenan di Abraham. Na ken e mensahenan di e profetanan tabata dirigí?

Dos di nan a profetisá pa ku Israel (Oseas i Amos). Mensahe di dos (Jonas i Nahum) tabata dirigí pa ku pueblo di Nínive. Jonas tabata un profeta na Israel i Dios a mand' é na Nínive. Un a profetisá na Babilonia (Daniel). Profesia di un otro (Abdias) tabata dirigí kontra Edom. Ma mayoria a profetisá pa ku Juda—shete profeta pa ser eksakto(Joel, Isaias, Mikeas, Jeremias, Habakuk, Sofonias i Ezekiel). Ministerio di e último tres profeta a tuma lugá despues di eksilio, despues ku e hudiunan a regresá na nan tera (Hageo, Zakarias i Malakias).

IV. ORGANISASHON DI BUKINAN PROFÉTIKO

Ku regularidat por ripará ku e 17 buki profétiko ta dividí den dos grupo:

A. PROFETANAN MAYÓ

Tin kwater profeta mayó: Isaias, Jeremias, Ezekiel, i Daniel. E buki di Lamentashonnan tambe ta inkluí den e grupo aki. Ma Lamentashon tabata skirbí pa Jeremias, pues tòg ta keda kwater profeta mayó.

B. PROFETANAN MENOR

E ultimo 12 buki den Tèstament Bieu (kuminsando ku Oseas i kabando ku Malakias) ta konsiderá e bukinan di e profetanan menor

Nos Tèstament Bieu na idioma Papiamento ta kontené 39 buki. En kontraste, Beibel hebreo (di hudiunan) ta kontené 24 buki. Ma tòg e contenido ta identiko. Motibu pa esaki ta pasobra e buki di Ruth ta forma parti di e buki di Huesnan, e bukinan di Samuel, Reinan i Kronikanan no ta partí na dos, e bukinan di Esdras i Nehemias ta forma ún solo buki i *e 12 profeta menor ta formá 1 solo buki yamá “E Diesdos”*.

E motibu ku algun profeta ta yamá mayó òf menor no tin nada di hasi ku e importansia di e bukinan òf nan mensahe. E tin di hasi solamente ku e grandura di e bukinan. Ta visto ku e bukinan di Isaias, Jeremias-Lamentashonnan, Ezekiel, i Daniel ta muchu mas largu ku e otro bukinan. I probabelmente mensahe di tur “E Diesdos” tabata skirbí riba un ròl den era promé ku tabatin buki manera nos konosé awendia.

VI. MENSAHE DI E BUKINAN PROFÉTIKO

E mensahe prinsipal di e profetanan a trata ku e kondishon moral i spiritual-religioso di Dios Su pueblo. Profetanan a aparesé mas parti ora e nashon *no* tabata biba pa Dios.

Nota algun opservashon tokante e bukinan profétiko:

A. DOS MENSAHE BÁSIKO

1. Reprendementu

En general, e profetanan tabata e personanan ménos popular di nan era pa e motibu aki. Bèrdat masha poko ta popular serka pekadornan!

Un gran porsentahe di nan palabranan tabata repredementu. Nan a duna un diagnosis di e kondishon spiritual di e nashon i pueblo di Dios i a denuncia nan pikánan spesífiko i dirèkt. Nan a eksponé e formalidat di nan religion, mustrando ku kurason di e pueblo tabata leu di Dios. Nan a denunciá e idolatria di e pueblo di Dios. Na lugá di sirbi e bèrdadero Dios, nan a bandon'E i bai tras di idolonan.

Hopi bes e mensahe di e profetanan tabata un mensahe di kastigu i disiplina pa motibu di desobediensia. E profetanan a pre-mira e kaptividat di Israel (e pais di nort), loke a sosodé na man di Asiria na aña 722 B.C. (deskribí den 2 Reinan 17). Nan tambe a profetisá e kaptividat i eksilio di Juda (e pais di sùit). Babilonia tabata e enemigu den e kaso aki,

kapturando e stat di Jerusalèm na aña 586 B.C. (Por haña relato di esaki den 2 Reinan 24-25). Sigur no ta hustu pa akusá Dios di huzga sin duna amplio spiertamentu adelantá. Bes tras bes e profetanan a reta nan pueblo pa repentí promé ku Dios ta kastigá nan piká. Ma nan no a skucha.

Ta bon pa poussa i splika ki meta enemigunan di pueblo di Dios tabatin ora nan a saka pueblonan for di nan mes pais despues di konkistá nan. Motibu pa e deportashon tabata pa destruí kualke sintido di nashonalismo òf identidat polítiko den e hendenan konkistá, pasobra nan tabata purba forma un solo impero for di hopi diferente nashonalidat. Pa pueblo di Dios, esaki tabata un problema doctrial tambe. Nan ta pueblo di Dios, apartá pa Dios, bibando den e tera primintí.

Pa kumpli ku nan tarea, e profetanan mester tabata hòmbènan di konvikshon i kurashi. Tin ora nos ta haña e impreshon ku e profetanan tabata super-humano...ku nan nunca tabatin miedu. Ma echu ta, nan tabata hende “*ku un naturalesa meskos ku di nos*” (San 5:17). Nan tabatin miedu meskos ku nos. (Jeremias tabata un profeta ku a ekspresá kla su emoshonnan.) Ma nan a pone nan temor un banda i a papia loke Dios a duna nan di bisa! Nan a denunsiá piká i a hasi apelashon pa pueblo di Dios repentí.

2. Bendishon

E profetanan no a mira e parti negativo so. Nan tambe a profetisá di un era glorioso ora Dios lo reina despues di kastigá Su pueblo. Apesar di e skuridat di nan era, nan a mira e splendor ku lo bin den futuro. Por ehèmpel, nan profesianan a inkluí e binida di e Mesias, e restorashon di e pueblo di Dios na nan mes tera, e reino di e Mesias riba mundu kompleto

Tambe e profetanan ta konsolá esnan ku ta konfia i obedesé Dios. Un bon ehèmpel di esaki por ser hañá den Isaias 40-66.

B. BÈRDATNAN IMPORTANTE TOKANTE DIOS I HENDE

E profetanan ta dediká hopi espasio den nan skirbimentu pa konta e pueblo hudiu di Dios, Su karakter, Su reino, Su propositonan, Su leinnan. Por bisa ku e soberania di Dios ta visto tras di tur kos. Jehova, e Dios di e pueblo hudiu, ta Esun ku ta hasi i deshasí manera E ta haña ta bon. E ta Esun ku ta manda nashonnan kontra Israel i Juda pa motibu di nan piká.

C. KUATER PERSPEKTIVA PROFÉTIKO DI E PROFETANAN

Ora bo ta lesa e bukinan profétiko di Tèstament Bieu, kòrda ku e profeta *por* tin diferente perspektiva. Pa ser eksakto, e por tin kuater míra distinto.

1. Talbes e ta fiha su bista riba e kondishon di e era di e profeta

Kada profeta a biba den un sieru era, ku siertu situashon religioso, politiko, kultural, moral, èts. Ora e studiante di Beibel ta studia e bukinan profétiko, ta masha importante pa e sa e situashon kultural, politiko, religioso, moral, èts. di e era di e profeta. Bo por haña basta di e informashon aki lesando e bukinan di Reinan i Krónikanan. Por ehèmpel, Isaias 1:1 ta bisa bon kla ku Isaias su ministerio a tuma lugá durante reinado di Uzias, Jotam, Akaz, i Ezekias. E bukinan di Reinan i Krónikanan ta konta storia di e reinan aki entre otro.

Tambe ta importante pa sa kiko tabata e kondishon internashonal den era di e profetanan, kua nashonnan a menasá pueblo di Dios. Mas parti e enemigu di pueblo di Dios tabata Asiria òf Babilonia. Ma tabatin otro enemigu tambe. Por ehèmpel, den Isaias 7, Juda ta menasá pa Israel i Siria.

2. Kisas e profeta ta konsentrá riba e menasa di koutividat i restorashon

Bes tras bes e profetanan ta laga sa ku Dios lo kastigá Su pueblo pa motibu di nan piká. Nan a profetisá di esaki.

3. Por ta e ta mustra riba e binida di nan Mesias

4. Talbes e profeta ta mira e Milenio i e shelu i tera nobo

Ta komo sifuera e profetanan ta wak den distansia i ta mira kuater diferente seru ta resaltá...kada un mas leu ku e otro. Ma hopi biaha e profetanan no por a mira ku tabatin un distansia entre e serunan...un lapso di tempu. Nos, bibando 2500 aña despues di e profetanan sa ku tin un lapso di tempu entre siertu evento. Ma maske e profetanan tabata sa di eventonan

binidero, nan no a mira e lapso di tempu entre e eventonan tur ora. Ta importante pa kòrda esaki ora bo ta studia e bukinan profétiko. Por ehèmpel, profetanán ta papia di e Mesias ku lo reina (Isa 11) i e Mesias ku lo sufri (Isa 53). Ma ta parse ku nan no tabata sa ku lo tin un lapso di tempu largu meimei di e dos eventonan ei.

Pa komprendé nan palabranan, e studiante di Beibel tin ku determiná di kua evento profétiko e profeta ta papia. Tin ora e profeta asta ta papia di mas ku un evento profétiko na mesun tempu.

Segun G. Campbell Morgan, e mensahe di e profetanán tin tres elemento: a) un mensahe pa e hendenan di nan mes era—dirèkt for di Dios; b) un mensahe di eventonan futuro pronostiká; i c) un mensahe pa nos era—prinsipionan duradero di bon i malu.

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 302-306.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 3, p. 197-214.
- Benware, Paul N., *Survey of the Old Testament* (Chicago: Moody Press, 1988), p. 170-175.
- Demaray, Donald E., *A Layman's Guide to Our bible* (Los Angeles: Cowman Publishing Company, 1964), p. 99, 109.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 309-318.
- Jensen, Irving L., *Jensen's Survey of the Old Testament* (Chicago: Moody Bible Institut, 1978), p. 318-326.
- MacRae, A.A., *Zondervan Pictorial Encyclopedia of the Bible* (Grand Rapids: Zondervan Publishing House, 1976), vol. 4, p. 879, 900.
- McGee, J. Vernon, *Thru the Bible* notes, p. 200-201.
- Mears, Henrietta C., *What the Bible is All About* (Minneapolis: World Wide Publications, 1966), p. 205-210.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 85-94.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).